

समे – 12:25 hrs.

<><><><><><>

Waves Global Media (Revised)

वेव्स शिखर सम्मेलन च अज्ज बड्डलै वैश्विक मीडिया संवाद शुरू होआ। विदेश मंत्री डॉ. सुब्रह्मण्यम जयशंकर, सूचना ते प्रसारण मंत्री अश्विनी वैष्णव ते सूचना ते प्रसारण राज्य मंत्री डॉ. एल. मुरुगन इस संवाद च हिस्सा लै करदे न। सूचना ते प्रसारण मंत्रालय इस भव्य कार्यक्रम दा आयोजन विदेश मंत्रालय दे सहयोग कन्नै करा'रदा ऐ। वैश्विक मीडिया ते मनोरंजन दे लेहाज कन्नै भारत दे जुड़ाव स्हाबै एह बड़ी मती महत्वपूर्ण उपलब्धि ऐ। एहदे शा पैहले प्रधानमंत्री नरेंद्र मोदी होरें कल च'उं दिनें दे सम्मेलन दा उद्घाटन कीता। एहदे च एशिया, यूरोप, अफ्रीका ते अमरीका दे प्रतिनिधिमंडलें सने 60 शा मते मुख्यें दे हिस्सा लैने दी मेद ऐ। संवाद दा मकसद अंतर्राष्ट्री सहयोग गी प्रोत्साहन देने दे कन्नो-कन्नी सब्भनैं शा बधिया प्रथाएं गी बढ़ावा देना ते प्रतिभाएं दे इक-दुए दे इलाकें च कम्म करने दे मौकें ते समर्थ निर्माण दे उपास तलाशना बी ऐ।

<><><><><><>

Oath

जम्मू-कश्मीर ते लद्दाख हाईकोर्ट दे मुख न्यायाधीश जस्टिस अरुण पल्ली होरें कल 2 नमें नियुक्त कीते गेदे जजें - जस्टिस संजय परिहार ते जस्टिस शहजाद अजीम होरेंगी जम्मू-कश्मीर ते लद्दाख हाई कोर्ट दे जजें दे रूपै च सगंध चुकाई। सगंध चुक्कने आहला एह

समारोह जम्मू च मुख्य न्याऽधीश हुंदे कोर्ट रूम च लोआया गेआ। इन्हें 2 नमैं जजें दी नियुक्ति कन्नै जम्मू-कश्मीर ते लद्दाख हाई कोर्ट च इसलै कम्म करा'रदे जजें दी गिनतरी कुल 15 होई गेई ऐ जिंदे च मुख्य न्याऽधीश होर आपूं बी शामिल न।

<><><><><><>

SC-Generic Med

सर्वोच्च अदालतैं डॉक्टरें गी एह हुक्म दिता ऐ जे ओह मरीजें लेई कुसै खास कंपनी दी दवाईयां लिखने दे बजाय छड़ी जेनेरिक दवाईयां गै लिखन। राजस्थान हाईकोर्ट नै पैहले गै इस सरबंथे च हुक्म देई दिता दा ऐ। दवाइएँ आहली कंपनियें दी मनमानी कन्नै जुडी दी इक याचिका पर सुनवाई करदे होई सुप्रीम कोर्ट नै आखेआ ऐ जेगर इस फैसले दी पूरे देशे च पालमा कीती जा तां एहदे'नै बड़ा महत्वपूर्ण सुधार होई सकदा ऐ। सर्वोच्च अदालतैं दी त्र'उं न्याऽधीशें दी पीठ नै एह हुक्म दिता ऐ जेहदे च न्याऽमूर्ति संदीप मेहता, न्याऽमूर्ति विक्रम नाथ ते न्याऽमूर्ति संजय करोल होर शामिल हे। अदालतैं आखेआ ऐ जे एहदे'नै डॉक्टरें गी दवाईयां बेचने आहली कंपनियें आसेआ कथित तौर पर रिश्वत देने दा मुद्दा बी हल होई जाहग ते कन्नै इस फैसले कन्नै इलाज-मुआलजे दे खोतर च बी बड़ महत्वपूर्ण सुधार होग।

<><><><><><>

LoC-Firing

पाकिस्तानी बलें जंदी उप्परोतली 8मीं रातीं बी जम्मू-कश्मीर च कब्जा रेखा पर बिजन भड़कावे दे गोलीबारी कीती। रक्षा सूत्रें मूजब पाकिस्तान आसेआ लौहके थेहारें कन्नै कीती गेदी

गोलीबारी दा भारती बलें असरदार ढंगगै'नै परता दिता। हासल जानकारी मूजब पाकिस्तानी बलें कुपवाड़ा, बारामूला, पुंछ, नौशैहा ते अखनूर सैक्टरें च कब्जा रेखा दे इस पार आहले इलाकें पर लौहके थेआरें कन्नै बिजन इश्तेयाल दे गोलीबारी कीती। सौहगे भारती जवानें इस गोलीबारी दा बनकदा परता दिता।

<><><><><><>

Kedarnath

उत्तराखंड दे रूद्रप्रयाग जिले च स्थित विश्व प्रसिद्ध केदारनाथ धाम दे कपाट अज्ज बड़डलै 7 बजे वैदिक मंत्रोच्चारण ते बशेश पूजा अर्चना दे कन्नै श्रद्धालुएं लेई खोली दिते गे। इस पवित्र मौके पर देश-बदेश थमां जहारां बद्दे श्रद्धालु बाबा केदारनाथ हुं'दे दर्शनें आस्तै उत्थे पुज्जे दे न। बाबा केदारनाथ धाम च ऐल्लै भक्ति, श्रद्धा ते जोश दा अनोखा संगम दिक्खने गी लब्बा'रदा ऐ।

<><><><><><>

Machail-Yatra

इस ब'रे दी श्री मचेल माता जी दी जातरा दे प्रबंधें दा जायजा लैने लेई किश्तवाड़ दे डिप्टी कमिशनर राजेश कुमार शवन होरें कल इक समीक्षा बैठक सद्दी। बैठक दौरान प्टि कमिशनर होरें श्रद्धालुएं लेई स्थूलतां उपलब्ध करोआने सरबन्धी, इसलै जारी ढांचागत परियोजनाएं दा जायजा लैता जिं'दे च जातरी भवन गी जून म्हीने दे पैहले हफ्ते तगर मुकम्मल करना, स्वच्छता परिसरें दी मरम्मत करोआना ते भवन दे आले-दोआले दे इलाकें दा विकास करोआना शामिल ऐ। एहदे अलावा जातरा दौरान पानी ते बिजली दी निविघ्न ढंगगै'नै सप्लाई जकीनी

बनाने पर बी ध्यान केंद्रित कीता गेआ। मुख करी ध्यान श्रद्धालुएं दे रौहने-बौहने आहली
थाहरें, सुरक्षा सरबन्धी तैयारिएं, गुलाबगढ़ थमां मचेल तगर बेहतर शिड़क राबते ते संपर्क
सुविधाएं गी निगगर बनाने पर दिता गेआ।

<><><><><><><>

IPL

आईपीएल क्रिकेट च अज्ज गुजरात टाइटन्स दा मुकाबला सनराइजर्स हैदराबाद कन्नै होग। एह
मैच संझा साङ्गे 7 बजे अहमदाबाद दे नरेंद्र मोदी स्टेडियम च खेङ्गेआ जाहग। एहदे शा पैहले
जंदी रातीं होए दे मुकाबले च मुम्बई इंडियन्स नै राजस्थान रायल्स गी 100 द्रौड़ें कन्नै हराई
दिता। मुम्बई आसेआ दिते गेदे 218 द्रौड़ें दे लक्ष्य दा पिच्छा करदे होई राजस्थान दी पूरी टीम
16 ओवरें ते 1 गेंद च 117 रन्जें पर गै सिमटी गई।

<><><><><><><>

Weather

जंदी रातीं गरज-चमक कन्नै होई दी बरखा नै जम्मूवासियें गी पिच्छले केइएं दिनें थमां जारी
जबरदस्त गर्मी थमां राहत थहोई ऐ। जम्मू ते एहदे आले-दोआले दे इलाकें च जंदी रातीं अंधी-
झक्खड़ दे कन्नै दरम्याने दर्जे दी बरखा बरने करी तापमान च कमी महसूस कीती गई।
मौसम विभाग नै पैहली मई थमां लेइयें 5 मई तगर प्रदेश दे केई हिस्सें च हौली बरखा,
अंधी-झक्खड़ ते गरज-चमक कन्नै बरखा बरने दी संभावना दस्सी दी ऐ। मौसम विभाग

मूजब, 6 थमां 8 मई तगर, खिते च मौसम आमतौर उप्पर खुश्क रौहग ते दिनें दा तापमान बी सामान्य कोला मता रेई सकदा ऐ।

<><><><><><>